



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguaintas fatschendas:

Plan da quartier Pütvia-Sotchà

Pel territori da Pütvia-Sotchà vain elavurà actualmaing ün plan da quartier. Il böt es da pudair trar a nüz il terrain impustüt per chasas cun plüssas abitaziuns. Il cussagl cumünal ha discus intant dumondas fundamentalas, p.ex. cubaturas, cifras d'utilisaziun e plazzas da parcar publicas. El voul pussibilitar - adonta da la zona W3 - sün üna pitschna part dal quartier eir chasas d'üna famiglia.

Stradun, lavuors da sanaziun

Pel traquet tanter la Gallaria Milo e la Via dals Bogns prevezza il büdschet 2009 lavuors per CHF 560'000.--. Intant esa gnü evidaint chi's laschan realisar quist on be las lavuors d'infrastructura (aua, chnalisaziun e provedimaint electric) sainza la rimplaina e la surtratta definitiva, quai surtuot pervi dals fabricats privats chi bsögnan il Stradun transibel plü lönch pussibel. Plünavant sto il cumün as tgnair inavo cun seis agens fabricats pervi da l'actività da fabrica chi'd es quist on in general fich gronda.

Via Rachögna - Val Chalzina

Il cussagl ha decis da nu metter ad ir quist on la via da god tanter Plan Mar e Val Chazzett, dimpersè ün toc da la via champestra Rachögna - Prads Fain - Val Chalzina. Siond cha eir quista via serva ad ün adöver forestal (svödar il batschigl da retenziun da la Chalzina) survain il cumün listess las subvenziuns correspudentas. Ils cuosts restants pel cumün importan amo CHF 19'205.--.

Loipa Scuol - Martina

La cumischiun Loipa Scuol - Martina prevezza da cumprar üna nouva maschina per far la loipa. Il cussagl cumünal ha approvà il credit da CHF 36'728.-- (part da Scuol). Quist import vain lura integrà aint il büdschet cumünal pel 2010.

Senda dals miniers

La Fundaziun Schmelzra S-charl prevezza da realisar üna senda istorica dals miniers. Il cussagl cumünal ha decis d'inviar la dumonda correspundenta in sen positiv a l'Uffizi chantunal pel svilup dal territori, culla cundiziun cha'l cumün nun haja da surtour ingüns cuosts pella construcziun e'l mantegnimaint e neir ingüna respunsabilità.

Canorta

La società Chüra d'uffants tschercha urgiaintamaing localitats per üna canorta, davo cha la PEB nu s'ha declerada pronta da sustgnair la varianta cun containers cha la società vess miss in pè svesa sül areal da la chasa Puntota. Il cussagl cumünal ha evaluà sün quai differents lös ed es gnü a la conclusiun cha la chasa da l'Energia Engiadina saja il stabilimaint il plü adattà. Sül plan da la butia e dals magazins ingio chi's rechatta fin la fin dal 2009 l'IES dess perquai gnir fatta quist on chi vain l'investiziun necessaria per cha la Spitex possa tour a fit la butia ed üna part dal magazin, l'otra part dal magazin vers ost dess pudair tour a fit la società Chüra d'uffants per la canorta.

Il cussagl decida da perseguitar quista soluziun sco eir da tour in vista l'idea d'integrar i'l planterrain da la Chasa EE ün local per giuvenils suot 16 ons. Tuot quists locals vegnan libers cur cha l'ArenaTech e l'Impraisa electrica fan müdada aint il @-Center.

EE-Energia Engiadina

La transfuormaziun da l'EE in ün'interpraisa independenta dvainta plü concreta. Il cussagl cumünal da Scuol ha discus il proget insembel culla cumischiun da l'Energia Engiadina. El es da l'avis ch'ün servezzan da basa stopcha restar illa respunsabilità dal man public, v.d. dals cumüns. Per quist scopo dess gnir fuormada üna corporaziun, eventualmaing suot il "tet" da la CCC-OEE (Corporaziun dals cumüns concessiunaris da las Ouvras electricas d'Engiadina). Als 24 avuost 2009 ha lö üna radunanza cumünala d'infuormaziun, la votumaziun a l'urna a Scuol per dar glüm verda a quist pass es previssa pels 29 november 2009. In vista al marchà d'energia liberalisà esa necessari cha la EE dvainta ün'organisasiun da taimpra regiunala ingio cha tuot ils cumüns pertocs pon as partecipar e na be plü il cumün da Scuol. I's tratta lapro surtuot da mantgnair la gestiun cullas plazzas da lavur illa regiun.

Zonas da protecziun per la sulvaschina

Per discuter la tematica da zonas da quietezza in general vain fuormada üna cumischiun cul schef dal departamaint Marco Müller sco president. Sper rapreschantants dal cumün d'essan far part a quella exponents dal turissem, da l'uffizi forestal sco eir persunas chi mainan gitas.

Zona da quietezza Lischana

L'uffizi da god dal Grischun dal süd ha constatà gronds dons da sulvaschina illa zona da quietezza dal Mot Lischana e nun accepta perquai plü ingüna prolungaziun da tala. Il scumond d'access a la zona dal Mot Lischana es sà scadü fingià als 31 december 2007. L'asil da sulvaschina exista però inavant. Üna cumischiun, presidiada da Hanspeter Dorta, s'occupa culla dumonda scha quist asil dess gnir impitschni e spostà parzialmaing suot il Mot San Jon. Ils ulteriurs commembers da quista cumischiun sun Armon Parolini (società da chatschaders), Chasper Michael (guardgiasulvaschina), Gian Cla Feuerstein e Reto Caviezel (Uffizi forestal chantunal resp. cumünal) .

Surdattas da lavuors

Via da Liuns

- impressari: Mario GmbH, Scuol
- installaziuns sanitarias: Guido Christoffel, Scuol
- surtratta: Implenja Bau AG, Scuol
- serrürier: Jachen Bischoff, Scuol

Chasa da scoula, ascensur extern

- isolaziun externa: Bezzola Denoth SA, Scuol
- reboccadüras internas Marcus Wetzel, Scuol
- construcziun dal tet: Foffa + Conrad SA, Scuol
- surtratta dal tet: Stecher SA, Scuol
- fuonds: Gisep Decoraziuns, Scuol

Zona d'indigens Spinatscha

- lavuors da planisaziun: Stauffer & Studach AG, Cuaira

Dumondas da fabrica

Il cussagl resp. la direcziun han dat ils seguaints permiss da fabrica:

- Flurin Denoth, Clozza Dadora: suost per autos
- Yvonne + Reto Mayer: chasa d'abitar in Sotchà Dadaint
- Reto Vitalini, Sotchà: collectuors da sulai

sco eir divers permiss per sondas geotermicas, müdamaints interns da stabilimaints, renovaziuns eop.